



Premionan pa Caiso & Soca Monarch 2017 a worde entrega



ORANJESTAD (AAN): Na Centro di Bario Brazil, Stichting Musica a entrega e premionan monetario na e ganador y finalista nan di Aruba Caiso & Soca Monarch 2017. Tur compositor y areglista envolvi tambe a ricibi un reconocimiento y premio durante di e anochi e ganadornan di e premio pa "Best Costume" y "Best Dressed Band" a worde anuncia. E maestronan di ceremonia, Ruben "Scorpio" Garcia y Maicky "Campo" Oliva percursa pa un ambiente ameno y chistoso. Presidente di Stichting Musica, señora Edwina Werleman a ricibi esnan presente cu un palabra di bonbini, na unda el a expresa su satisfaccion cu e resultado y acogida di e festival. Den number di e directiva completo di e fundacion, señora Werleman a gradici e patrosinadornan cu a haci e cuatro anochinan di Aruba Caiso & Soca Monarch

2017 posibel y u exito grandi. Stichting Musica a urgi e musiconan presente pa uza e oportunidad pa relaha y refleha riba nan participacion y pa semper mantene e union necesario entre otro pa sigui aporta na Carnaval di Aruba y e festival den forma positivo. Seguidamente sr. John Hassell, presidente di hurado di Aruba Caiso & Soca Monarch 2017 a duna splicacion amplio riba e Roadmarch Contest, con esaki ta worde huzga y di cual ganador lo worde anuncia e prome dialuna despues di e paradanan di Carnaval 63. E contest aki ta basa riba e popularidad di e cancionnan den comunidad y durante di e paradanan. Sr. Hassell a indica cu e votacion lo tuma lugar pa medio di un sondeo entre tur radio emisora, conhuntamente cu un panel di hurado independiente cu ta distribui riba e ruta di e siguiente

paradanan: Lighting Parade, Parada di Luz, Parada Grandi San Nicolas y Parada Grandi Oranjestad. E Roadmarch Contest, popularmente conoci como "Roadjam", ta worde sosteni pa Aruba Bank NV. E anochi a sigui cu e anuncio di Best Dressed Band, cu a keda den number di e banda Buleria. E puntuacion a worde basa riba e originalidad / impacto causa den publico, uniformidad di e banda completo y e tema Carnavalesco of relata na e composicion. Buleria a score halto den e ultimo categoria, uzando "cover all" color orañon relata na e tema di e Caiso titula "Kooyman y Bohama". Chantal "Queen Chanty" Quant, cu a worde acompaña riba escenario pa e banda OREO, a sobresali cu su costume sumamente bunita acaba y pa e motibo aki a gana e titulo di "Best Costume". E competencia den e categoria

aki tabata fuerte, sinembargo e costume di Queen Chanty a destaca riba escenario y tambe riba potret y pantaya di television na un modo espectacular. Sr. Chibi v/d Hans di e revista carnavalesco "Bachannal" a entrega un aprecio na cada finalista y ganador, den forma di un potret di cada un durante di nan presentacion riba escenario. Algo cu e cantantenan sigur a aprecia di e revista renombra aki, cu ta den cumpli 20 aña riba mercado. Na final di e anochi tur cantante, compositor y areglista a worde yama dilanti pa asina ricibi nan cheque y plakaat di parti Stichting Musica. Señora Shahaira Labad tabata un di e personanan encarga cu e entrega di premio, representando SETAR N.V., cu manera ta conoci ta haci un contribucion substancial na Carnaval di Aruba pa añanan largo. SETAR N.V. a duna di conoce cu nan ta contento di por duna

nan aporte na Stichting Musica y Aruba Caiso & Soca Monarch 2017 y ta kere cu e canticanan cu ta keda crea pa cu e festival aki ta hunga un rol importante pa e exito di nos Carnaval y tambe pa historia di Carnaval di Aruba. Stichting Musica a enfatisa cu nan ta considera e musiconan e actornan principal di Aruba Caiso & Soca Monarch y ta sumamente orguyoso di por a cumpli cu e entrega di premio dentro di un siman y mey despues di e anochi final, pa demonstra cu pa e fundacion, e musiconan ta keda na prome lugar. E organizacion a expresa cu nan tin confianza den e ganadornan pa carga nan titulo den forma digno, como representanten di Caiso & Soca Monarch y como figuranan publico cu ta worde admira door di grandi y chikito, y asina contribui na tene e imagen y balor di e festival y Carnaval di Aruba na halto.